

se Athilam suosq; illius precibus omni genere crudelitatis: Pari affectis calamitate transpadanis populis: Papiæ: Placentiæ: Parmæ: Mutinæ: Superato Apennino in Etruriam se confert: Inde Romam ducturus. Consultis aruspibus & monentibus: Vt urbem eam caueret: Exemplo: Alarici: qui ea capta continuo extinctus est: In Galliam reflectit iter. Incertus tamen animi & ardens adhuc cupiditate uidentæ Romæ: suspensis itineribus substitit aliquantisper. Obuiam fit interea apud Hostiliam Leo pontifex plenus dierum cum Altero ex consulibus & magna Senatus parte. Posteaq; Athila in conspectu fuit: Pontifex & qui cum eo erant ex equis desilire. Propius deinde facto: Senatus Leo inquit populusq; Romanus: uictor quondam orbis terrarum: Nunc a te o Athila uictus pacem oratum uenit. Ad hanc tuam gloriam: nihil addi poterat nisi ut cum supplicem haberes: ad quem paulo ante uniuersus orbis supplicatum concurrebat. Vicisti igitur orbem terrarum: qui uictorem illius uicisti. Restat nil aliud: nisi ut qui tot gentes sub ditionem misisti: nunc ipse te parcendo uincas. Nam si deo assimilis esse uis: ut ferunt te cupere: Qui iam omnes mortales es supergressus: Cogita deum non minus gloriosum esse parcendo: q̃ cedendo. Sensere flagellum tuum contumaces: sentiant nunc supplices clementiam & bonitatem: posteaq; imperata quacūq; iusseris sunt facturi. Ad hæc pontificis uerba Barbarus defixo aspectu: & oculis intentis: contemplatus Venerabilem pontificis effigiem: Canosq; & madentes lachrymis oculos: Tactus communis fortunæ misericordia est. Itaq; substitit aliquantisper cunctabundus. Et iam magis magisq; mitescere animo incipiebat. Vt uero Consul & Senatus ad pedes illius sese prostrati prouoluere: Victus tandem est. Et uultu apertiori iussis ut starent: nullo alio ad consultandum sumpto spatio: Bono estote inquit animo tu Pontifex uosq; Romani. Veniam libentes damus. Sunt qui dicant: & in primis cælius ea conditione ueniam impetratam: ut pendere quotannis tributum hunnis pollicerentur. Duces exercitus seorsum maiorem immodum quam hæc uiderent: admirati tam subitam regis facilitatem: Cur inquit tam cito inuicte Rex de sententia decedis? Ferunt Athilam respondisse: Nonne uidistis duos illos iuuenes: Alterum a dextris: a sinistris alterum strictis gladiis: toruis oculis mihi mortem minantes: nisi quod petebat senex iste promitterem? Nostrum est imperium: Nostra Roma: uectigalis Hunnorum facta. Reuertamur ad uxores & liberos pleni opibus quas promissi: pleni gloria. Siue igitur id fuit: siue quia ingenio fer-

*Leo Romanus pontifex*